

Htawm tem' ri tuil' ri Títas' eun

¹ Htawm ti ok' aen' na ko', meuh uí Paw'lu meuh mhai' Eun Peucawó' maeé' peue caee Eun Yesú Hkrit pun hk'a' yum' ce peue Peucawó' leuk Eun ri ti na' maeé' pun cú'yi kaw cang yawng ku' leupaws seumeu' Eun Peucawó' ná, ² hk'a' yum' maeé' cú'yi aen' a tang' kleum' ri ri keutuí hpum' cit' tip á'yu tip co'cu ná'. A meuh ku' Peucawó' un' cang chí'lai ná yeuh Eun kati ri tang' neum yam ná un' nang kue' ka ná'. ³ Yam rot a yam tang' Eun ri uin' ná, Eun kaw yeuh peue ná' ce yawng leukah' ri ná' ri ku' sangsawn' uin' Eun ri uí' ná' hot' seun' leukah' tuil' Eun Cawó' teum'kawm htut é' lawtpon ná' Eun.

⁴ Uí' tem' ri tuil' htawm aen' a ri Títas' ku' meuh kon' uí' neumneum hk'a' naee hk'a' yum' seun' puri ná' mi.

Kah mun' sin' maeé' hk'a' kuit nyawk' kuit sam'ran cumyen' lih neum Kuing' Peucawó' maeé' neum Cawó' Yesú Hkrit Cawó' teum'kawm htut é' lawtpon ná' kue' ri mi reu'.

Kan' ku' yeuh Títas' nang kaw' Kret'

⁵ Hk'ah' uí' ri uin' mi ut' nang kaw' Kret' ná' meuh a punta kaw mi suip kan' un' nang hawc' ná' ce maeé' kaw mi leuk ri uin' ro'kan nang kawt muk kon' Hkrit ku veng seun' leukah' ku' tawm' uí' ri uin' ná'. ⁶ Ro'kan nang kawt aen' ce kaw kah ri meuh peue un' kue' vang ri, kah ri meuh peue kue' yawo beun' ti peue. Kon' ce ná' ce kaw kah ri meuh peue yum' maeé' kah ri meuh peue un' uin' peue lah' ri meuh peue eo' kleuc' peue maeé' un' uin' peue lah' ri meuh peue lheu' leukah'. ⁷ Kopti ro'kan nang kawt muk

kon' Hkrit ná' ap ce ri yeuh kan' Eun Peucawó' ná', ce kaw kah ri meuh peue un' kue' vang ri, un' kah ri meuh peue yeuh alo ri, un' kah ri meuh peue hpum' dot', un' kah ri meuh peue nyui ri yuic' ri plai', un' kah ri meuh peue kleuc' peue klaee' peue, mae' un' kah ri meuh peue hpum' un' leupaws seumeu' ri hk'il' leumuil. ⁸ Daecti kah ri meuh peue cang rap ri ti chec', leumeus' ku' chak', pawn sati ri, meuh peue leupaws seumeu', seunga' chak' mae' cang eut' hpum' ri. ⁹ Punta kaw ce cang tuil' kaw'l'reng peue seubu ri leukah' leupaws seumeu' ná' mae' kaw ce cang htu'hting' pe peue to'tam' leukah' sangsawn' awn' a ná', ce kaw kah ri jhawp' ri hot' leukah' sangsawn' hk'o'yum' ku' tawn rin ce hawc' ná' keutawn'.

¹⁰ Kopti peue un' leuceng leukah' ná' kue' peue heun'. Ce meuh peue eo' lah' ku' un' meuh ná'. Punta kaw peue yum' a ná', ce lah' a. Peue aen' ce ko', a kue' hk'a'naee muk ce peue ton' duing' hak' ná' heun'. ¹¹ Kah ri yeuh ce dit'ti. Kopti sangsawn' ce ku' un' htuk' ri sangsawn' ná', a gawm yeuh nyahk'ul' ná' ce lu heul' heun'. Ku' sangsawn' awn' a meuh punta kaw ce pun leumuil ná'. ¹² Saec' meuh peue tamnai hk'a'naee ce ti peue ná' eun, eun ku lah', "Saec' yamnhaw', peue kaw' Kret' ná' meuh ce peue cang chí'lai, ce seun' sat' hk'i rai ná', ce hk'a pon hk'a lheu', ce keunah." ¹³ Leukah' aen' a meuh a neumneum. Kop awn' na, sangsawn' ce rengreng punta hk'a' yum' ce ná' kaw a cawp', ¹⁴ mae' kaw ce un' leuceng leukah' apom ce peue Yu'da ná' mae' kaw ce un' leuceng ritroe ce peue tecla ku' leupaws seumeu' ná'. ¹⁵ Pun ce peue hpum' seunga' ná', ku ceu ná' seunga' ka. Daecti pun ce peue hpum' hk'aw'jeuk mae' peue un' yum' ná', a hkuin' kue' ku' seunga' ná' saec' ti ceu. Neumneum ka ná' ko', kamkuit mae' hpum' cang yawng ce ná' a ku hk'aw'jeuk yeut. ¹⁶ Ce saec' lah' ri yawng Peucawó' Eun, daecti ku' yeuh ce ná' a tecla Eun. Ce meuh

peue hk'aw'jeuk, peue un' cang leuceng ri ti maeé un' kuing' ri yeuh kan' chak' na' ku ceu ka.

2

Ku' sangsawn' cawp'

¹ Mi kaw kah ri sangsawn' a hot' seun' leukah' leupaws seumeu' na'. ² Sangsawn' a'ta' kawt na' ce meuh peue cang yawng tu' ri, kaw peue cang hkopyawm' ri ce, ce na' cang eut' hpum' ri, kue' kaw' reng hk'a'naee hk'a' yum', hk'a'naee hk'a' leumeus'keus na' maeé hk'a'naee vang cang yeun'hkam na' reu'.

³ Seun' awn' na, sangsawn' a'ya kawt na' ce ri a'yu im' hk'a'naee hkopyawm' ri Peucawo' Eun, un' va ri saesawm' peue maeé un' va ri kue' yin plai'. Daecti kah ri cang sangsawn' ku' chak' na'. ⁴ A lawn yeuh keutit' ko', ce kaw cang sangsawn' a'ya aet' na' ce ri cang leumeus' me ri maeé kon' ri na' ce, ⁵ cang eut' hpum' ri, meuh peue seungá, cang rok'sa nyahk'ul' ri, hpum' chak' cang tuckyak maeé cang leuceng leukah' me ri. Ce lawn yeuh keutit' ko', peue hkuin' kaw lah' ku' un' nawpsang ri leukah' Eun Peucawo' na'.

⁶ Seun' awn' na, tuil' kaw' reng ce me a'yu kaw'n' nhum' na' kaw ce cang eut' hpum' ri. ⁷ Cu ku' chak' yeuh mi ku ceu na' meuh vang hot' rin ce ri ti. Vang sangsawn' mi na', kah hpum' seumeu' hpum' nhim' mi na' pucti lih. ⁸ Punta ku' sangsawn' mi na' kaw a un' kue' vang ri peue a na', sangsawn' a hk'a'naee vang leupaws seumeu' na' reu'. Yeuh keutit' ko', peue ham'tap e' na' ce kaw kaic, ce na' un' laee kue' vang ri e'.

⁹ Sangsawn' mhai' na' ce leuceng leukah' cawo' ri na' ku ceu, co'ca' ri yeuh ku' htuk' hpum' cawo' ri, un' va ri htu'hting' cawo' ri ¹⁰ maeé un' va ri rabawk' eun, daecti yeuh eun nyu meuh ri peue hk'o'yum' neumneum. Yeuh

keutih' na' ko', ce kaw yeuh leukah' sangsawn' lawng Eun Peucawo' Cawo' teum'kawm htut e' lawtpon na' lec hk'a'naee hpum' ce cawo' ri na'.

¹¹ Kopti mun' Eun Peucawo' cang htut na' puc a ri lih ri peue gawm'euc' hawc'. ¹² A sangsawn' e' tecla ku' un' chak' na' mae' ku' ta'nha' ka bhen' keute' na'. A ku sangsawn' e' a'yu im' eut' hpum' ri hk'a'naee cu cat aen' na, meuh peue leupaws seumeu' mae' a'yu im' hot' Peucawo' Eun. ¹³ Hk'a'naee cu cat aen' na, ko' e' vang keutui' hpum' mun' htonnuk na'. Vang keutui' hpum' mun' htonnuk awn' a meuh munhpung' Eun Yesu' Hkrit Cawo' meuh Peucawo' Cawo' htut keuting e' na' kaw a pucti lih na'. ¹⁴ Tuil' Eun tu' ri na' ri e' meun, a meuh punta kaw Eun teum'kawm htut e' lawtpon hk'ai' ku' rai na' ce gawm'euc', saic' ri uin' e' seungá pun Eun, kah e' meuh peue Eun koe mae' kah e' seuyung'seuyah' yeuh ku' chak' na'.

¹⁵ Kop awn' na, kaw mi pun ri sangsawn' lawng aen' ce. Lo' ti'ca mi na' gawm'euc' ka tuil' kaw' reng mae' tuil' sati peue reu'. Pawlaee uin' peue chaw hkamram mi.

3

Yeuh ku' chak'

¹ Tuil' sati ri kaw peue ut' hk'a'ruim cawo' yeuh kan' kuing' mae' nang kue' an'nya na' ce. Kah peue leuceng leukah' ce na' mae' rangraen ri kaw yeuh ku' chak' na', ² pawlaee peusah' nyoe peue, leumeus' hk'a' cumyen' na', yeuh ri yawng hpum' peue, yeuh ri hpum' onawn' ri peue gawm'euc' reu'.

³ Kopti nanggal' aen' na e' ku tawn meuh peue nga' suisa, un' cang leuceng ri ti, kleuc' hk'a' ri, ta'nha', hot' hk'a' ren'kawm na' ku ceu. E' a'yu im' hk'a'naee ku' rai na', hko'e mang' puri, pereng puri mae' ces ri puri. ⁴ Daecti yam hk'a' tuckyak mae' hk'a' leumeus' keus Eun Peucawo'

Cawo' teum'kawm htut é lawtpon na' puc a ri lih na',
⁵Eun kaw teum'kawm htut é lawtpon. Aen' a hkuin' meuh
 kopti yeuh é ku' leupaws seumeu' na', daecti a meuh kopti
 hk'a' tuckyak Eun na'. Eun teum'kawm htut é lawtpon ri
 hk'a' saic' seunga' ka tang keut' hk'u' na' maeé' hk'a' tang
 hpanpleng' hk'u' é hk'a'naee Cit' seunga' chak' na'. ⁶Eun
 buit Cit' seunga' chak' na' ri é htonnuk ri Yesu' Hkrit Cawo'
 teum'kawm htut é lawtpon na' Eun. ⁷Aen' a meuh punta
 yam pun é ri sawn' ri meuh peue leupaws seumeu' na', é
 kaw keut' ri meuh peue suip' sin', kue' vang keutui' hpum'
 cit' tip a'yu tip cot'cu na'. ⁸Leukah' lah' ri ing' aen' a meuh
 leukah' hk'o'yum' nyawk'. Punta peue yum' Peucawo' Eun
 na' kaw ce co'ca' ri yeuh ku' chak' na', mi na' sangsawn'
 lawng aen' a ri ce meulamlam ri reu'. Ceu nang aen' ce
 meuh a ku' chak', a kue' peuehot' pun peue gawm'euc'.

⁹Daecti vel un' htuk' un' lung nga'o' ri puri kop lawng
 ceuhkeu' na' maeé' htu'hting' puri, kleuc' leumeul puri
 kop lawng leukah' ritroe na' ce reu'. Kopti ceu nang aen' ce
 un' kue' a peuehot', a un' kue' ngos. ¹⁰Tuil' sati eun peue
 yeuh peue gvah muk gvah cum puri na' eun nanggal' ti
 pok, hawc' ko' tang tuil' sati eun lal' pok ti pok. Hawc' ka
 na', pawlaee yeuh a'mawo eun baeé. ¹¹Peue yeuh keutit'
 na' meuh eun peue un' seun' peue ri, eun lheu' ri map',
 ku' yeuh eun na' a lak' taws' a'mu ri heun meun, mi pen'
 yawng a meulamlam ri.

Leukah' tisut'

¹²Atemas' eun un' lah' Tai'hki'kas' eun un' lah', yam cus'
 ui' eun ing' rot ri mi na', co'ca' mi ing' hk'eup' ui' nang veng
 Ni'hko'polis' na' vaeavae aw. Kopti kuit ui' ri kaw ut' nang
 veng awn' a rot ti yam kawt' na' pon ka. ¹³Yam Yenas' ku'
 meuh peue yeuh kan' ritroe kuing' maeé' Apaw'lu long ka
 hk'a' na', hk'o' mi teum'kawm ka seun' ku' yeuh pun mi

na', pawlaee va ka kue' ku' cuthkuin' saec' ti ceu. ¹⁴Peue e' na' ce htuk' ri rin lawng tan tu' ri yeuh ku' chak' na', punta kaw ce cang tuil' ku' lo' peue vang a'yu im' ri ku seunyi na' mae' kaw ce un' cang meuh peue un' plí' na'.

¹⁵Peue ut' mae' ui' na' ce ku peue, ce ku tawm' a ce lah' ri leunyeng ri mi. Peue leumeus' e' hk'a'naee hk'a' yum' na' ce, lah' ce mhawng' leunyeng ui' ri ce. Kah mun' sin' Eun Peucawo' na' kue' ri pé' gawm'euc' reu'.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 19 Oct 2021 from source files dated 14 Jul
2021

0468b0b5-acb2-59c4-92d3-4fa09a4d091c